

正定縣志

十二至十三四

邱坊公署
墓表

22.6213
1030.273
17

Kodak Color Control Patches

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

0 10 20 30 40 50 60 70 80 90 100 110 120 130 140 150 160 170

正定縣志卷十二

公署新

衛民有城泣事有署所以敷教化專責成肅觀瞻嚴防範也而各官以傳舍視之任其頽廢而無人修整又豈所以為政乎故將創修年月詳著於篇俾後人知所考鏡焉

正定府署 在城內西北即元正定路舊署元中統王

戊建泰定乙丑

舊志作大定誤泰定元泰定帝年號大定乃金世宗年號

達魯花

赤康里復撤新之

禮儀院大祝郡人郭士文為記在府署

元末遭兵革

明洪武十年知府郭勉復之正統六年知府黃忠成

化十三年知府余瓚宏治八年知府張淑各增修正

德元年知府彭澤建循天理堂澤自為記 在府署嘉靖十六

年知府宋宜立題名碑刑部尚書唐龍 為記已剝落萬曆戊寅知

府錢普於大門東增置迎賓館

國朝以來遞有增修乾隆十七年知府富尼漢修右輔

雄藩牌樓二十年知府傅筠修鼓樓大堂二十三年

知府鄭大進修蕭曹廟左右牌坊二十四年又建東

書房八間重葺三堂後宅山亭蓮亭內外宅門小配

房十一所道光十一年知府關炳建射亭咸豐間知

府史策先改為南花廳知府徐鏞又於廳南濬池補

植花木同治六年十一月又補修大堂前右輔雄

藩牌樓一間左右承宣表率坊各一間照壁一

座察吏安民小牌坊各一間西醫官房三間

藥王廟三間東陰陽官房三間大門鼓樓五間

馬快房五間步快房五間皂隸房二間聽事

吏房三間轎夫房二間土地祠三間圍牆門

樓一間儀門三間左右廊書辦房四十二間半地

戒牌樓三間井亭二間東西角門各一間大

堂五間配房一間蕭曹廟三間圍牆門樓一

間巨盈庫門樓一間庫廢東房三間外宅門一

間 東側官廳一所 西北房六間 書辦房二間
門皂房二間 內宅門三間 門房四間 屏風牌
樓一座 三堂五間 東書房前後兩廳六間 廂
房一間 又書房八間 西書房四間 南書房三
間 廚房三間 東西圍房十四間 內院屏門一
間 住宅正房圍房廂房書房共二十六間 角門
小亭一座 土山 名臺 嶺山 山亭三間 東西配亭二
座 西亭有漢絳侯周勃壽星 圖碑記今移關帝廟中 小房二間 山下水
蓮亭一座 東馬道門一間 關聖廟三間 二門
三間 大門一間 馬神廟二間 更樓一間 圍

房一間 鋪房一間 土地祠一間 西圍房六間
馬房三間

以上共二百二十四間

同知署 在府署西明同知舊署大堂東立明推官宋
齊題名碑西立宋齊所作協中堂記或即推官之署
乎歷任同知逐加修葺同治十一年同知郭斌壽稟
請興修一律完整

頭門三間 二門一間 科房三間 班房三間

大堂三間 日協中堂中懸康熙年間 御賜石禮哈

匾曰雲深魏闕 宅門三間 門房三間 二堂三

間 簽押房二間 三堂五間 廂房東西十間

三堂耳房一間 南花廳三間 北花廳三間 東

院書房五間 跟班房三間 馬號三間 馬棚三

間 二堂後小院書房二間 關帝廟三間 大門

一間

經歷司廨 在府署東共二十四間今廢僅存關帝廟

另賃公館在陽和樓北大街路西

教授廨 在府署東共十六間 詳學 校

訓導廨 在府署東共十九間 詳學 校

縣署 在西大街不詳建始明洪武四年知縣葉思敬

因舊修建成化五年知縣李景修重建 吏部員外郎 左贊為記

萬曆二年知縣周應中五年知縣郭衢階相繼增修

國朝以來嗣有修葺同治十一年知縣慶之金重修大

堂以外係因舊式逐加完葺自大堂後重加創建規

模基宇迥非舊觀 自為 記

照壁一座 轎夫房二間 大門三間 東西班房

十二間 關帝廟三間 大門一間 土地廟一間

二門三間 東西角門二間 禁卒房三間 獄一

座 獄神廟一間 左右兩廊科房二十四間 蕭

曹廟三間 大堂三間日絜矩堂 迤西馬神廟三

間 抄書房二間 驛書房二間 徒犯房三間
新建東西差房各二間 宅門一間 門內左右遊
廊六間 二堂五間曰明允堂 東西廂房各三間
宅門迤東偏院東屋三間 循二堂而東內爲厨飯
房茶水房共十三間宅門迤西由月洞門轉入者爲
西廳北屋三間舊爲嘉樹軒今改爲鳴琴種花之室
南屋三間爲留賓所院西空壁玲瓏中建小亭一間
亭之西院由亭北又一月洞門轉入內爲方池池南
疊石爲山山後有籬籬外有屋四間爲書記之室
池迤西屋三間爲花神祠池北舫齋三間曰遙青書

舫 齋北院中西屋二間曰觀心境 二堂後左右
廂房各一間 其北爲內宅門門內三堂五間 東
西屋各三間 堂東一院北屋三間 東屋三間
東角門一達於井廁 循堂而西一院內書齋三間
爲藏書處 二堂迤西一院北屋三間 後廂屋一
間爲帳房 帳房之西有更道 更道西一院 南
屋三間 其北正屋三間 西廂屋三間 再北又
一院正屋三間 西廂屋三間均爲幕友辦公之所
以上共大小屋九十七間

典史廨 在縣署西偏

教諭廨

在縣治西

詳學校

訓導廨

在縣治西

詳學校

總兵署

在衛前街明正定衛舊署也歷任鎮臺逐加

修葺

練軍營

在鎮署西新築壁壘

左營游擊署

在臨濟寺西守備舊署也

右營游擊署

在東大街

左營守備署

在衛前街路南

右營守備署

在小紅廟街路東

龍固營

在西大街縣署之東

火藥局

在西北隅西南北屋各三間大門一間

演武廳

在北門外明萬曆四十三年修前後六間南

將臺西照壁沙地一十九頃六十四畝二分不毛之

地無糧今名大教場

練軍營

在北門外教場東西二營新築壁壘

大公館

在府治東南風動書院舊址也乾隆四十一年

知府方立經改建歷任知縣逐加修葺同治十年

十一年大雨傾圮過半

倉廩

豐盈倉

在府治東南二十四間今廢卽南倉

豫備倉 在府治東卽北倉久廢

按舊志載豐盈倉九十間設倉大使一員明時縣爲

屯兵重地軍儲充實我朝撫節已移歲額遂逐漸

議裁厥座之廢以此

常平倉 在縣治東房二十四間

社倉 在縣治北房九間

義倉八 一在朱河村 一在凌透村 一在杜家庄

一在大孫村 一在曲陽集 一在七極村 一在

新城鋪 一在大河村

乾隆十三十四年知縣高對建

養濟院 在南大街路東

留養局三 一在城內崇因寺北 一在伏城驛關帝

廟北 一在城南十里鋪彌陀寺前

乾隆十七十九年知縣高對來儀建

公署舊

正定明爲巡撫駐節之所末年設立兵營以資防範
公署星羅棋布 國初猶因其制而舊志詳載無遺
今雖勢易時移舊署已鞠爲茂草而頽垣斷礎考古
者每憑眺於其間謹據舊志悉爲登記庶遺制不至
湮沒云爾

巡撫行臺 在縣學西景泰元年知府張玉創建成化

間知府邢簡田濟相繼增修宏治元年都御史林廷

玉自作留餘書屋自爲記十二年都御史李瓚立巡撫

題名碑自爲記嘉靖六年都御史何詔重修仍於衙後

創度案樓六以分貯六郡積牘並立涼亭萬曆三十
九年都御史王國於廳事右作籌邊臺天啟元年都
御史胡思伸更廓轅門甬道兩旁增置柵欄於門之
左設鼓樓規製宏敞倍增於舊

本朝康熙八年巡撫移保定遂廢

御史行臺 在縣治東北天順前不可考成化六年知

府邢簡重修十一年知府田濟卽正廳增置東西廂

房嘉靖十二年巡按御史胡汝輔立題名碑

檢討蒲田黃廷

用爲二十四年巡按御史裴紳卽堂東隙地建觀德

亭二十七年巡按御史劉瑤建穿廊暨後堂卷房規

制乃備萬曆二十七年巡按御史葉清改觀德亭爲
迎恩

本朝巡按裁撤遂廢乾隆二十九年知府鄭大進卽舊
址建風動書院四十一年知府方立經改建書院遂
爲大公館

清軍同知署 在府署儀門東屬甬道而北今廢

經歷司署 在同知署東今廢僅存關帝廟

巡捕同知署 在府署儀門西屬甬道而北今同知公

署卽其地也

管糧通判署

管關通判署

理刑推官署崇正十五年推官李讚明重修

照磨署

檢校署

知事署

縣丞署 在縣署東

各官俱裁署皆廢故址不可考矣

巡撫中軍公署在巡撫行臺西

中軍游擊署 在縣治南今名馬軍營

左營游擊署 在縣治北署兩旁爲本營兵營房天啟

一二年都御史張鳳翊創建

右營游擊署 在縣治東南兩旁爲本營兵營房天啟

一二年都御史張鳳翊創建

前營游擊署 在縣治東北舊名井大民兵營天啟二

年改爲前營

後營游擊署 在縣治東北舊名車營天啟二年改爲

後營營制改移官亦裁撤故址不可考矣

正定衛 在縣治東南衛前街本元燕南河北道廉訪

司治洪武三年改置正定衛隸北平都司永樂元年

改直隸京師經歷司在衛堂左鎮撫司在衛治西左

右中前四千戶所前所在衛治之東左右所在衛治之南中所在倒馬關永樂五年於右千戶所內撥一百戶守禦順德七年調後千戶所守禦定州景奉元年調中千戶所守禦倒馬關仍屬本衛軍器局在衛西北今衛已裁撤改爲總兵署

神武右衛 在正定衛西原屬陝西華州衛洪武二十六年改爲西安右護衛宣德五年起調赴京改今名移置正定是年四月內建經歷司在衛堂左鎮撫司在衛治右左右中前後五千戶所俱列於衛堂東西軍器局在衛西北今衛已裁撤右營公所卽其地後

有水坑尙名衛監坑

守備署 在縣治東南今改爲中營游擊署

太僕寺 在縣治西北成化十一年通判衛英重修今廢地尙名太僕街

三司行臺 在縣治西北相傳卽太僕寺

侍郎府 在縣治東南正統十年創建成化二年知府邢簡重修後爲抽印木植內官監監官署今廢

稅課司 在縣南門外屬府今廢

遞運所 舊在縣治東後移於北城外又移於西北隅設大使一員今廢

南倉 在衛前街南今廢地尚名南倉口

北倉 在東大街北今廢地尚名北倉口

恆山驛 在縣治東南屬府成化中知府邢簡田濟相

繼修葺嘉靖十七年康熙五十七年重修雍正四年

裁地尚名官驛口

武學 在西門內迤南萬曆二十六年都御史李盛春

建今廢

陰陽學 在縣治東北

醫學 在縣治東北

射圃亭 在縣西相傳卽今旗鼓廳今廢

草場 在城東北隅屬府嘉靖二十七年知府孫續建

今廢地尚名草場

養濟院 在縣治東南

小教場二 一在西門內迤南今廢一在貢院東天啟

三年都御史張鳳翊建

抽分廠 在城南滹沱河岸內官監抽分木植監官舊

駐此後移入城廠猶在每監官巡河仍莅此今廢地

尚名木廠

修正定公署記

郭士文

真定公署自中統壬戌營建然不知主名之爲誰壬
戌距今泰定乙丑六十四年矣堂宇罅漏戶牖欹傾
而規制初亦迫隘前後歷數十政非無賢者迺因庠
習陋漫不加省日入於壞故世指真定 大邦以府
治爲不稱爲鄉老吏民者病之歲癸亥達魯花赤康
里氏大尹趙公相繼來爲是邦踰年政成民以甯息
一日慨然以更修府治爲事謂陛級不嚴則位望不
崇甚非所以布宣德澤示民以上下之分也於是率
僚屬卽故治之西市亢爽之地經度焉就舉總判劉

承直董其役發貲于官雇功于民以畚以築以繩以削先正其視事之廳次及幕賓之所與夫羣吏之舍下至厨庫井厩各以序爲而截然一新自五月壬午始事至十月丁亥卒功蓋諸公刻意之專用力也勤故能易壞爲成如是之敏旣而以其事屬士文記之將列置壁間以告來者竊聞禮有必隆不得而殺政有必舉不得而廢諸公於是兼而得之故樂爲之書

真定府增修公宇記

朱中敏

真定當燕趙之郊雄於河朔異時棟宇鱗次弦誦之聲相聞也元之季年兵革旁午崇臺夏屋鞠爲茂草

其僅存者千百一一官署惟一公堂其餘因陋就簡卑庳湫隘不足以展事洪武四年廬陵梁公乃來佐郡閔公宇之弊缺將圖繕完以斯民之求且屢弗登不暇及也迺卽耆老而謀之曰庫藏之弗固學宮之未備官僚吏隸之無所羸不可以弗圖也於民生之不易不可以弗念也姑息以廢事固吾職所不敢勤民以圖功亦吾心所不安也將若之何哉衆默然莫知置辭旣乃公復曰吾聞積羽沈舟聚蚊成雷吾將以其農隙商其帑力酌而用之掄材陶甍日就月將相時興役其不墜吾事而民無大感矣乎僉

曰諾哉遂以其謀白太守郭公大喜議以克合乃召屬邑令長喻以斯意咸諾而退既三載而政成當洪武之七年邊陲無事人和歲豐農收竣事爰鳩僝功惟時郭公入覲悉倚辦於梁公輔襄則有通判鄆公經歷蔣公比將就緒而知事楊公則來巡功程督力預多焉工良吏勤子庶競勸百材全集不日告成曲勢丹雘不愆于素門庭崇邃廊廡軒閎功堅壯緻不麗不華外而按察司明倫堂惠民局行用庫豐盈倉內各官各吏之堂寢以至庖園之屬罔不備具凡一千五百有一十楹為間二百有四十有三厥功夥而不價於力厥費浩而不殫於財故民不知勞焉蓋郡公心存於愛民必不得已而用之必以其道而不底於病古所謂擇可勞而勞之者其在斯乎既落成梁公則顧而嘆曰美已乎輪煥哉是皆出自吾民之力厥亦勞矣其可蔑以垂將來俾知厥難罔或廢墜乃屬獲鹿縣令朱中敏記之中敏辭以文不稱不足以托之金石公曰姑本末其事以識歲月云爾奚辭為哉乃不敢牢讓遂為之記

循天理堂記

彭澤

正德丙寅澤叨守真定名隄之退寢曰循天理堂客

見而問之澤曰天卽理也所謂天命之性也循而行之卽率性之謂道也曰旣曰性又謂之天理何也曰對人欲而言也曰天理人欲人孰不知必揭而書之何也曰人心惟危道心惟微天理之心難得而易失故書以自警也曰廣庭獨非循天理之所乎乃名之退寢何也曰廣庭之上僚友在焉吏胥侍焉大夫人士仰而觀法焉中人之資必知所警畏矣若退寢則易以人不己知而自欺也曰予聞以人不己知而自欺絕滅天理之小人也知反己而自修循天理之君子也退寢如是廣庭如是念念在茲體用一源顯微

無間者聖賢也居是地者孰爲小人乎何待物之薄也曰聖罔念則狂矣小人非聖所諱而况君子乎曰循天理遏人欲老生常談也子不幾於贅乎曰正心誠意之說雖世主所厭聞而實大儒君子尊主庇民扶世立教之大端也客謝而別因述以爲記併書之屏間庸以爲三十二郡縣吏民造福之張本也

重修府山亭記

鄭大進

郡齋之後有岡曰松嶺東西橫亘百餘尺緣高低而登短垣於其崖拔地隆起可三尋頂平而下削北向立視如列屏然岡之麓爲方亭亭東南古井淵淳引

其流以繞亭砌亭若建於方塘上者東側怪石羅布
或卧或仆或蹲或攫羣校技於廡下最北巨峰屹聳
觚稜突怒洞穴嵒岬特表爲松嶺門戶從此左旋卽
拾級而登礪道矣少北而西迨岡之半當巖鑄松嶺
題額夫嶺以松名意必有天矯偃蓋之勢乃豁達呈
露無所謂參天之黛色蓋嶺則猶是而松不免於斤
斧之尋也再西數武却走東顧爲帶山亭俯瞰磴階
更上一層西望別有小亭下置漢絳侯所銘壽星碑
與帶山對影並峙而兩亭之間敞軒三楹延青混碧
平截天不迎暉餞日吐納萬景陟斯軒也穆然有藹

簷在望之思焉或以爲接引遙岑也故名帶山或曰
取如帶如礪之義殆深慮乎此亭之易創而難與圖
終也然考漢初絳侯初未至常山特其碑詞則以無
疆惟休致殷意此亦猶帶礪之說歟余之始蒞也亭
榭頽欹荒蕪叢合念廢墜之待修舉者勤求民瘼惟
日不暇給今忝守茲土且三年乃以公餘葺而新之
非欲以登臨娛視聽顧昔賢營度維辛屬意良篤殊
不願暨我躬之來而忍令就湮繼自今舊貫可憑於
後之來者蓋亦不無厚望嗚呼方亭寓澄清之志帶
山垂永裕之謀版宇恬熙風日晴美岡之靈亦政之

資也郡當燕趙河朔之衝恒山翠嶽滹沱潑潑余將志其大且遠者矣區區亭榭云乎哉

射亭記

李雲章

可以正身可以釋志可以比禮樂可以聯儕偶者其唯射乎古者賓祭大典皆用射故澤宮試者不尙主皮之科矍相從游爰來如堵之衆我朝弧矢宣威正直觀德雖儒臣文吏類能操習之然習焉而勿精精焉而勿恒則今正定之射爲盛矣太守仁和關午亭先生愷悌敦敏有斐無勗領郡踰歲政通民飭左圖右書供崔侯之百賦驅山走海擅鄭老之三絕

猶謂不下堂而理者未足習運臂之勞也時則榮總戎陶郡丞趙縣令恭和之友才藝竝多每當委蛇自公相與射鵠爲樂其始也薙艸開徑縛茆架棚炎曦饋蒸暑雨膚剝辟諸遽廬芟憩而已旣而涼露滌野梓人執功于是構望泉之墮材築味菜之間圃樸以昭儉采椽弗斲虛以延景清風自來檻倚氤氳之峯欄交蔥蒨之樹廣不過十笏而意遠巖壑高不越百甄而氣凌煙霞湄日射亭紀其實也乃鋪几筵樹棚的右挾矢左捭弓主賓長幼人五六爲一耦勝負羸絀籌八十以再周白羽流電曳聲而飛紅輪孕珠觸

影而碎射者神旺觀者色舞懸韞納菽列坐揚解揖讓于斯宴飲亦于斯蓋自亭之成而射愈盛焉然而窺其案則簿書晨興筆掃如葉升其堂則衙鼓晝靜庭閒落花政固靡弛而弗張人乃因勤而得暇夫南陽坐嘯永嘉勝游元稹夸州宅於樂天李遠消奕棋於長日曷若以挽強舒其體以審固養其心羣居焉而不爭反求之而無失者乎畜花竹魚鳥于座右則察榮瘁之萬形合文武賓僚以晤言備詢謀之五善則知太守之于射特其寄也而正定之有斯亭爲足稱矣太守題射者六繪射者二僕旣記之序之歌之

詠之及射亭落成復授簡相屬趙德爲潮州上客時點魏舒之籌孔融與元禮通家妄操逸少之筆爰稽殷人之序射用志夏屋之權與美斯干曰苞矣薄言約之立中道而躡如敢告能者

重修縣署記

慶之金

正定縣署在郡城西街歷年旣久屋宇傾欹梁棟朽壤同治辛未夏秋大雨連旬坍塌尤甚自宅門以內無一可以栖止余七月間抵任賃民屋而居焉幕友家丁人等分寄數處極多不便乃慨然重修大興工作大堂以外科房班房頭二門等處係因舊式遂加

完葺其自大堂後新建東西差房四間宅門一間門
內左右遊廊六間二堂正屋五間曰明允堂東西廂
房共六間宅門迤東偏院東屋三間循二堂而東內
爲廚房飯房茶水房共十三間宅門迤西由月洞門
轉而入者爲西廳北屋三間舊爲嘉樹軒今改爲鳴
琴種花之室前後軒窗開豁繚以綺欄嵌以琉璃花
木掩映宛然一佳勝焉院中列石峰三聳削高秀南
屋二間爲留賓所院西空壁玲瓏中建小亭一間東
西相通東顏曰迎曦西曰挹爽當新月初升晚霞欲
落坐此遠眺有應接不暇之景亭之西一院由亭北

又一月洞門轉而入內爲方池旁引曲水于以垂釣
于以採蓮池南壘石爲山如層巒疊嶂下有小橋曲
逕達于山陰以便登陟山後有籬籬外有屋四間爲
書記之室池迤西屋三間爲花神祠池北舫齋三間
四面皆窻南臨池水北有小院雜花叢竹芳翠交繁
齋中左顧右盼秀色盈眸不啻光明世界齋西一窻
達于外城上山光遙遙相望因顏曰遙青書舫齋北
院中西屋二間極爲幽邃名曰觀心境二堂後左右
廂房各一間其北爲內宅門門內三堂正屋五間東
西屋各三間堂東一院北屋三間東屋三間東角一

門往北達于井厠循堂而西一院內書齋三間爲藏書處庭前西南花砌各一雜植四時佳卉芳艷不絕齋後一門一窻臨于後園窗外新竹數竿瓜壺滿徑東西隔以疏籬女蘿牽牛之屬繚繞葱蒨園中央建一月台以爲朝夕登覽城中烟樹樓臺迷離恂恍其佳景較之西廳爲尤勝焉由二堂迤西一院北屋四間後廂屋一間爲帳房前與嘉樹軒後楹相對帳房之西有更道前通西廳之月洞門更道西一院南屋三間南與舫齋北院相連其北正屋三間西廂屋三間再北又一院正屋三間西廂屋三間均爲幕僚辦

公之所更道自西而北而東皆有圍墻繞護計共大小屋九十七間規模基宇迥非昔觀無異創建於同治十年八月十五日興工迨十一年六月三十日工竣計需銀二千二百兩有奇除詳准分攤銀八百兩正實捐廉銀一千四百餘兩竊嘗觀世之人於公廨每視爲傳舍莫肯加意修葺間有葺之亦不過補苴罅漏支持目前鮮有竭心思耗財力求其完且美者設一旦棄之去徒爲他人是娛豈不惜哉而余獨謂不然古人一信一宿猶必治其所居况服官斯土由一年至數年未能預計公餘之暇藉以怡性陶情抑

何不自適耶且非惟適焉而已凡吾人爲一事必當求其盡善未可以五日京兆之心稍存夫苟且之念也倘以五日京兆之心處之則於一邑之興廢萬民之利害皆視爲漠不相關一事苟斯無不苟其居心尙世問乎彼世之營良田美宅以貽子孫者謂可世世守之勿失耳詎知子孫一不肖則不數載爲他人有其與斯之足垂不朽果孰得而孰失歟噫

修正定鎮署記

崔世祿

正定爲燕南古郡當萬國朝會之衝左控山海右擁太行南臨大河濼繞如帶北距

帝都六百餘里爲京師保障所謂金湯百雉天塹之區國初特設都督開府於郡之東南隅蓋明之正定衛舊署也額其堂曰忠武明乎爲人臣者奮武功而効忠貞也厥署規模宏敞堂宇巍然甲於諸第我朝設官哀多益寡規制一新遂闢帥府於茲爰稽有明自正德中修葺以後迄今積百年矣風雨飄搖日就蠹蝕前貳帥會稽王公卽堂前尺五之地聯一大廈繼而清宛魯公高聳鼓廳恢廓門壁規畫煥爾改觀然皆踵事增華而已無補凋弊也余以甲午之秋由文選奉

特簡出鎮茲郡日曠荒頓詠嘆實深然古人有言天下未定何以家為此言王事不遑啟處也余蒞任之初正值四郊多壘竭力蕩除日無寧晷幸

天子宏庥經營十有餘載四野謐如方今腹心無桂苻之警陬隅絕烽烟之虞不乘此時治頽起敝使淪陷之餘忽焉邱墟不惟令後來者嗤前人亦非守官之義爰因戎政之暇捐俸庀材鳩工修葺委令把總官高登文王祥董成之先堂宇次六吏房次門樓廳壁次甬道周匝墻垣又次而六纛之祠以暨關帝土地馬神諸祠又進而寅賓館無不迺墜迺塗遍施丹

碧並節堂後長廊最後建書齋亭榭十數處公務暇時聊寄幽興或時退省其間焉綜計數月而工告成監者請誌之氓石余因思是役也余非敢任勞者第以鴟鴞惜工愛子及室乘今日之暇葺令宮室完固俾後來諸公退食無內顧之憂盡心戎務恪共忠武之義亦庶幾桑土陰雨之一助爾必謂究極壯麗使後無以加此非人臣之宜蕭相國猶見譏當世余豈敢蹈諸公勉焉

重修正定衛記

賈應春

嘉靖甲辰秋七月正定衛指揮使朱君時亨實以受

知撫巡出視徭政柄其事始朱君爲衛也申戒令飭
規畫慎鍵鑰密防檢植紀綱戢奸抑暴貞武息屯比
浹旬而土有挾纊之温投膠之樂颯颯溶溶政和而
平藉藉轟轟頌成而融不數月而胥人以甯優游政
暇其餘力尙可以兼營乃一日仰而思俯而嘆曰嗟
是衛也先使君常一葺之今且逾三十稔予竝承乏
歆者夷者傾且圯者繪蘇而蝕者及今爲之猶易也
矢此而勢 厥力 矣於是集僚屬選監者捐俸
倡義酌材鳩工命 督之日號於衆曰甯亟勿徐無
怠而備吾予而直吾庸而工是役也食以視壯募以

集工財匠費官役自防農葺用有漸而不日其成是
故先涖政之堂次退舍之廳廳事畢繼儀門旣而臺
觀旣而經歷之衛六吏之宇土神祠射圃亭次第修
舉繼而以三千戶所終焉歆者扶夷者起傾且圯者
葺而理新以金碧飾之丹粉炳乎煥然翬如翼如夫
自有衛以來未聞若此之完且麗也僚若屬胥以慶
曰朱君之德洪矣其先使君常葺之至君而復焉事
有所待功以人宏豈偶然歟始朱君議葺衛也人有
難者謂涉嫌叢怨危言胥動朱君曰試哉吾 之
則害大謀於道厥寡成矧鄉校毀僑廡裘諸孔於今

爲烈厥徵遐矣知惟慎惟公壯吾之觀而遑恤其躬
是故惟孝斯孚績用成易曰幹父之蠱有子考無咎
厲終吉又曰幹父之蠱意承考也朱君之謂歟未幾
朱君奉命晉大寧都司行且有日僚若屬謀勸課紀
君之功而請文於予予推重朱君之爲人美丰采善
談論有志古名將所爲少嘗從其父爲叅府特著名
邊庭他日總方鎮歷大都督府胥君優爲之於茲請
也義不得辭爰著此文刻諸珉石俾後人知朱君父
子不獨緝忠耀武且嘗世勤有衛也工經始於嘉靖
乙未正月之吉落成於記之日克先若役百戶徐延

年式相其事經歷劉世 俱朱君以賢才自簡用云

重修神武衛公署記

趙南星

正定古恒山郡畿南重地也洪武初天下甫定分隸
諸官軍於鳳陽錦衣等衛厥後分封諸藩調神武衛
爲秦藩護衛至宣德中革去護衛悉赴京師其時獨
有正定衛守土者上疏得請留神武衛於正定創建
公宇宏敞深遠迄今百八十餘年矣承平日久武節
日弛而縉綬者各有私第衛署任其傾頽遂爲鼠坻
蟻坦不可忍視萬厯甲寅春聶立中來署衛事入其
門喟焉愴歎問其圖籍則藏於吏胥之家最後西北

有坑焉約一畝有半深三丈許蓋創建時取土於此云立中遂請諸當道修葺之凡三月而告成堂廡五所六房儀門官庫悉還舊觀相其地勢左右欹頽乃悉鏟其贅土以納之坑而坑夷往者衛事刊敞日甚一日幾於搏手不可爲自立中至而千夫長百夫長咸自濯奮羣知屯糧之催徵委任得人而逋負悉完衛軍之健訟者嘆然不敢動簿領委積多年沈閣者今皆消散無餘矣繇斯以談安在衛事不可爲也則中立視公家事爲其家事也公夫人之作室者有地形唯隈而不爲平治者乎有掘土爲阬而不填者乎

歷時之久至百八十餘年者乎無論於形家言爲凶卽睨而念及之有不能一朝居者昔魯叔孫婁所館雖一曰必葺其墻屋漢郭林宗每行宿逆旅必躬自灑掃此皆傳舍也而不肯苟處矧其出政臨下之所而阬塹在側至於數世又任其傾頽而不顧尙望其挺身躍馬建功於塞上乎非立中至則將不復有所謂神武衛者矣立中定州之世指揮也少而業儒經術大通以父命襲職立中威儀棣棣志芳而材駿見武弁摧抑日甚有以自守不爲非禮調俗嘗爲薊鎮守備其觀察戾人也以夙卻害之仕三十年而猶縮

衛符彼仗鉞登壇者皆何人哉立中屬余記且問堂名於余余命之曰德義堂其說在趙衰之稱卻縠也立中有其風焉

正定署中見鴈

何出光

未卜人南去重看鴈北來一聲春草綠千里暮雲開不繫帛書至空排錦字回梁園于幾日飛過孝王臺

正定署中榴花

馬三才

爲愛天邊種誰將後院栽對予寒共暑見汝落仍開密葉偏增色孤丹不受埃非因桃李妬長日重西臺院中池蓮有花偶吟四絕

辛自修

菡萏新收映水紅一杯遠謝種蓮功芳亭玉井年年

發獨使人思後樂翁

許東漸中丞以
後樂名亭

菡萏春容月滿池晚風搖漾動漣漪殷勤爲語池中

物早作甘霖潤四維

時恒陽
大旱

菡萏幽香遠更清也來華署寄時榮應知不爲秋風競敢向人傳君子名

菡萏亭亭照小軒對君猶自憶西園寄言四友莫相

笑

家有四友
記並詩

十載寒盟定不諼

登郡署山亭

王榮勣

石磴樞衣上憑欄四望通恒山秋樹外滹水晚烟中

花氣爭薰袖蟬聲亂度風可憐形勝地禾黍半城空
平臺玩月

林深偏碍月寒袂共登臺萬里清光合千峰爽氣開
風香飄桂子冷露濕蒼苔不減南樓興空慚作賦才

郡齋芍藥

羞同凡卉鬪芳妍故向餘春騁麗娟氣象未全離富
貴丰姿應得近神仙玉盤金帶他年種惠露仙風此
地偏寄語東君休便去會看調鼎五雲邊

左丞詩芍藥和金鼎

中秋夜郡署山亭宴集限韻

華筵高會玳簪齊待月中秋日已西天意也憐秋色

好蟾輝不許片雲迷風生玉塵高談發筆落紅牋妙
句携遙想霓裳歌舞處桂花香滿護仙栖

縹緲山亭翼瓦齊筵前肯放月輕西露垂花葉珠光
碎烟鎖平林練影迷數曲琴心天籟和一腔詩興麴
生携漫爲萸菜鱸魚想秋老梧桐待鳳栖

鄭雨泉太守有高尚

志之

九日山亭宴集

秋光四面擁亭前九日登臨興洒然菊綻東籬花似
錦樽開北海酒如川遙山千疊堆寒翠賓鴈一行寫
暮烟河內無人能借寇明年此會在誰邊

雨泉太守已調任天

津

山亭晚眺

振衣亭子上臨迥意何長
靄靄山烟碧蕭蕭木葉黃
亂砧敲薄暮一雁背斜陽
牢落題詩處西風拂帽涼

郡齋菊花盛開爲茅先生賦

幕府間新種菊花三秋開
徧勝陶家黃金片片凌風
正紫玉層層帶露斜太素
分將陰嶺雪深紅妬煞赤
城霞晚來錦繡生香處細
酌青州興未涯

雪後署齋小集和幕中諸子原韻

慶之金

久被風塵汚因疎翰墨香
忽聞幽韻叠如聽素琴張
白雪聲難繼青燈味不忘
宦途舟一葉每自慎隄防
斗室三間築虛窗四面開
消寒名士集詠雪衆仙來
豪飲飛金盞奇書檢玉杯
酒酣歌慷慨懷古問叢臺
此地萍蹤合前身香火緣
杜陵詩人聖梅福吏稱仙
鳥倦思歸樹鵬飛看戾天
檀心開數點春意逗瓊筵
慶式如新葺縣署亭臺堂
室顏以嘉名各係以

詩以記其盛

趙文濂

克允心推赤維明眼着青
信能貞匪石鑑可察無形
茂草生園室閭花落訟庭
殷殷欽恤意座右可垂銘

明允堂

花自河陽種琴從單父鳴古人敷愷澤到處播循聲

千載心源接二年政績成徽音兼麗藻尚友有深情

鳴琴種花之室

共事清漳久列賓古道存連床同聽雨投轄共開樽

竹裏重通徑花間又叩門故人陳榻下如水淡交論

留賓所

空壁玲瓏隔孤亭建此間三峰排峭拔一徑遶彎環

迎紫曦升海來青爽挹山主人幽興好朝夕快登攀

迎曦挹爽之亭

窈窕二間屋鮮妍四壁花池通波曲折石疊路欹斜

芳卉叢叢放疎籬面面遮神仙來往處祠建水之涯

花神祠

花木葱蘢植軒窗豁達開波光當戶映山色入城來

遠岫雲中露新詩雨後催玻璃斜照射五色炫樓臺

遙青書舫

洞啟虛堂敞澄觀內念深青山思近宅白水又盟心

鑑有明光照塵無俗慮侵公餘邀客坐軒爽豁胸襟

觀心境

雲拂階前樹香流架上書新花招蛺蝶古字註蟲魚

課子燈紅後開軒月白初閒來携一卷諷誦夜窗虛
處藏書

地僻窺園好心閒學圃殊幽居環竹樹矮架繫瓜壺
門掩檉花館詩題竹葉符開窗遙極目小小輞川圖

後園

樹古全遮碧樓高半露紅園開三徑外臺峙五雲中

村塢烟光澹城池雨氣濛暉陰朝夕變登覽興無窮

月臺

正定縣重修大堂記

補

郭衢階

按真定為畿輔重郡州縣隸之者三十有二而真定
縣則為郡輔邑先是縣治規制甚狹且陋恢拓整飭
則自李君景修始李君成化中令也迄于今百二十
年矣物久則弊勢也矧宮室乎風搖虫蠹前後堂室
樅者摧覆者缺廉者墮植者仄色者污在堂為尤甚
至將不能禦寇者豈前此為令者玩愒歲月視為傳
舍抑亦困于繁劇而不暇議及也予于春杪膺簡命
來今登堂而憮然謂是乃官吏之臨承士民之瞻望
攸繫雖不過求壯麗亦必棟宇堅完若茲堂且見傾

不旋踵矣是尙可以襲故偷安哉遂以此檄諸當道
諭彼羣黎請加改作固知上之必從而亦下之所樂
從者也于是飭材鳩工謀及卜筮獲吉又據堪輿家
向祿迺馬之說爲之審曲面勢廢而興之工師持墨
匠人運斤諸工林林然咸聽分委槌槩之摧者則隆
動之瓦覆之缺者則鱗翼之墮者仄者旣勤撲斲而
汚者又塗丹雘復于堂南煇建抱廳三間并東西二
庫皆爲更新制旣宏朗詹阿亦並輪奐工始于建申
之月甲辰越八日己丑而落成僉曰是可以聽政矣
未幾後庭隨且覆壓余曰虔其始不能厚其終非所

以昭其度也顧清風戒寒營室非時期越明年始命
工而從事于是爲之題額前曰忠愛後曰退思忠愛
足敬事退思足補過豈惟無曠厥官卽李君之績抑
目光昭矣然考春秋書夏城中邱傳者曰春秋凡用
民力必書其所興作不時害義固爲罪矣雖時且義
亦書見勞民爲重事也矧又糜財乎真定襟山帶河
地當孔道民疲于力而藏無積貯久矣斯舉也將無
得已乎及觀陰雨桑土之備則知及時綢繆者亦爲
政之急務非漫然勞民傷財于無益者也予固不敢
以日無息肩之故而他諉以致積弊而至于大壞也

則斯舉也其得已哉財無科斂下不見怨譁然後知
堂之不容不繕修也由是臨承者于斯瞻望者于
斯豈非一勞而永逸者乎噫廡祈之宮興而子野之
言驗予非喜任事也求以利民也民既利矣上必與
焉何憚于改作遂命工勒石以紀歲月云

正定縣志卷十三

坊表

書云表厥宅里樹之風聲所以崇德象賢礪世磨鈍
也正定在前朝功名鼎盛坊表林立輝映後先迄今
存者無幾矣據舊志詳載後之人將何以爭光前列
無忝巍科乎

恩榮坊 爲梁釗梁澤梁相立 一爲許金立

恩褒三世坊 爲梁釗梁澤梁相立

光啟坊 爲劉庠立

青宮太保坊 爲梁夢龍立 存

一品坊 爲梁釗梁澤梁相梁夢龍立

三世一品坊 爲梁釗梁澤梁相梁夢龍立

大司徒坊 爲賈應春立

大司寇坊 爲賈應春立

都憲坊 爲賈應春立

大司馬坊 爲梁夢龍立

少司馬坊 爲梁夢龍立

總督四鎮坊 爲梁夢龍立

大中丞坊 爲楊綵立

三世中丞坊 爲許瓚許金許守謙立 存

方伯坊 爲劉文莊立

都憲坊 爲劉文莊立

接武坊 爲劉文莊立

鄉貢進士坊 爲劉文莊立

三輔耆英坊 爲王佑王撫民王蔚王藻立

一門甲第坊 爲王佑王撫民王蔚王藻立

三世承恩坊 爲王佑王撫民王蔚王藻立

甲第傳芳坊 爲呂賢呂祚呂陶立

金緋接武坊 爲呂賢呂祚呂陶立

世芳坊 爲呂賢呂祚呂陶立

翰林坊 爲梁夢龍立

世職北臺坊 爲趙英趙世奎立

踵跣坊 爲張桓立

父子兄弟進士坊 爲王撫民王蔚王藻立

進士坊三 一爲張春立一爲李時立一爲劉芳立

經魁坊 爲李希賢立

鄉貢進士坊二 一爲王雲立一爲呂賢立

京闈進士坊 爲吳守節立

黃甲群英坊 爲張敏等立

青雲聚秀坊 爲李宣等立

辛丑進士坊 爲王撫民立

庚戌進士坊 爲呂賢立

癸丑進士坊 爲梁夢龍立

乙丑進士坊 爲許守謙立

戊辰進士坊 爲王藻立

丁丑進士坊 爲霍鵬立

登科坊 爲梁夢龍立

巳酉登科坊 爲劉芳等立

一門雙節坊 爲苗通妻崔氏苗梅妻張氏立

聖旨坊 爲武才用妻石氏立

正定縣志卷十四
貞節坊 爲梁世宦妻馮氏立
忠模懿範坊 爲陳顯際夫婦立 存

正定縣志卷十四

邱墓

自漢文帝爲趙陀先人置守塚歲時奉祀殊恩異數
史家傳爲美談晉唐迄宋將相代不乏人莫不塚象
祁連佳城預兆厯久湮沒無存金元有明遺迹雖有
可考而烟荒草蔓已在若存若沒之間不爲表章
後人無從考核矣古墓據舊志詳載

國初附入於後俾並垂不朽後之視今猶今之視昔也
牧莊三塚 明一統志在府城北每塚相去百步許相
傳戰國郡人藺相如廉頗李牧塚按靈壽亦有廉頗

正定縣志 卷十四
塚志云據輿圖備考廉頗墓在清河縣與鯨堤相近按史記本傳廉頗在魏楚陰使人迎之卒於壽春其墓又不應在趙又魏書藺相如塚在新樂趙州志州東二十里郭里村有頗塚轉相傳訛未詳孰是謹按戰國秦漢之趙在邯鄲今趙州正定之地非當年之趙也地未詳考故人多訛傳

趙佗先塚漢文帝爲佗先人置守塚歲時奉祀卽此元傳與礪詩殊方久識漢庭尊異代能忘聖主恩南粵若逢人借問尉佗先塚至今存舊志在正定城北三十里一統志引元和志謂卽獲鹿之趙王陵

金蔡松年墓 在城外仕金至宰相封魏國公卒勅葬於此

元丞相趙伯顏墓 在城北白家莊

元祭酒楊俊民墓 在城東國史院編修蘇天爵撰墓碑

元司業硯彌堅墓 在城北新城鋪國子監司業蘇天爵撰墓碑按彌堅漢上人元初大將招而北遂占籍正定見舊郡志

元蘇天爵墓 在城北三十五里成化五年重修
江駙馬墓 不詳世代在南化村

明左都御史劉文莊墓 在城東北西洋村西楊宜撰
墓碑銘

明戶部尚書賈應春墓 在城東盛板村西潘恩撰神
道碑梁夢龍撰墓志銘

明榆林巡撫張宏墓 在城南莊里村西南劉文莊撰
墓碑銘

明叅政呂賢墓 在城南古城村東石珪撰墓碑銘

明副使呂昨墓 在城南古城村東歐陽暎撰墓碑銘

明布政呂陶墓 在城南古城村東童承敘撰墓碑銘

明御史郭希愈墓 在城東北西洋村劉文莊撰墓碑

銘

明贈尚書梁釗墓 在城東盛坂村王銍撰墓碑銘

明贈尚書梁澤墓 在城東盛坂村歐陽暎撰墓碑銘

明吏部尚書梁夢龍墓 在城東盛坂村韓贍朱國楨

撰墓碑銘

明布政馬騃墓 在城西漚村高穀撰墓表

明叅政楊時泰墓 在城南高家營村東

明御史賈名儒墓 在城東盛坂村

明太僕寺少卿霍貴墓 在城北岸下村

明順天府尹王宸墓 在城東北西洋村

明御史趙瑛墓 在城西北永安村

明副史胡麟墓 在城西邢家莊

明兵部侍郎許守謙墓 在城東蟠桃村

明千戶余達墓 在城西南義棠村

明鎮守甘肅總兵官贈廣昌伯劉甯墓 在城西柏棠村

明山西巡撫楊綵墓 在城東北五里鋪徐文業撰神道碑

明副使王撫民墓 在東關

明山東布政使王藻墓 在東關

明光祿寺少卿王蔚墓 在東關

明殉難山東萊陽知縣陳顯際墓 在城東大林濟村

明山東章邱知縣李鎬墓 在城南東兩嶺村北

明指揮顏璟墓 在城北西邢家莊子都督僉事彪祔焉

明左都督劉國柱墓 在城南談固村

明岐山知縣陳盡忠墓 在城西北三角村

國朝

河南布政使吳嵩印墓 在城北牛家莊梁清標撰墓

志銘

河南知府吳國楨墓 在城西南花園村東

貴州提學道張純熙墓 在城外西北隅數十步

永和萊蕪知縣武士豪墓 在城東臨濟村西

浮梁青浦知縣婁維嵩墓 在城西斜角頭村北

副都御史劉元慧墓 在城南方壁村北

川北道何澄墓 在城南高家營村西

錦衣衛指揮使梁慈墓 在城東盛坂村東

給事中梁維本墓 在城東盛坂村

武德道梁維樞墓 在城東盛坂村

南雄知府梁維基墓 在城東盛坂村

吏部侍郎梁清寬墓 在城東盛坂村

吏部侍郎梁清遠墓 在城東盛坂村高珩撰墓志

保和殿大學士梁清標墓 在城東盛坂村高珩撰墓

志

太常寺卿王鍾麗墓 在城東固營村西北

廣西布政使王原膺墓 在城東固營村西北

榆林知府何夢蓮墓 在城南高家營村南

浙江按察使王定柱墓 在城東北賈村

四川提督孫清元墓 在城北岸下村

廣東陸路提督郭維昌墓 在城南東兩嶺村東

貴州威甯總兵武光琳墓 在城西南李家莊村南

前任正定縣知縣周灝墓 在城東北西洋村東

安籠鎮總兵倪昂墓 在城南湯家莊村東

署永州總兵崔起潛墓 在城東北西洋村東

鎮遠總兵孔廣源墓 在城東大臨濟村北

牧莊三塚

元張黼

山回路轉路悠悠千古英雄土一邱自是人心歸
大度驅除未了祖龍休

趙佗先塚

傅與礪

殊方久識漢庭尊異代能忘聖主恩南粵若逢人借
問尉佗先塚至今存

明梁夢龍

高塚纍纍列道旁尉佗南粵久稱王功成七郡歸真
主事去千年留故鄉古樹風烟巢鶴鶴夕陽坡壠下
牛羊牧兒芻豎閒來往一曲哀歌感盛嘗

國朝 梁清標

秋城睥睨倚雲霄戰後中原霸氣銷
夜雨空山行旅遍趙陵烟樹莽蕭蕭

南粵功成長百蠻尉佗荒塚枕空山
英雄既去同流水樹樹秋聲倦鳥還

梁清遠

墓林西畔鳥綿蠻石馬嘶風秋滿山
南粵霸圖銷歇盡可憐化鶴未知還

容不華

先人遺塚漢文修野樹殘烟起暮愁
南粵山河歸一

統樵蘇猶禁古恒州


蘇伯修先生墓

在新城舖

趙文濂

落葉蕭蕭打墓門一杯黃土白楊村
止餘野草生翁仲那有溪毛薦子孫
故壟誰言新木拱春風莫問舊亭存
安豐故里花千樹陟降應歸月夜魂





上海
卷一
七

